

SAMBUTAN KE-10 WILAYAH LIBATKAN SEMUA KAUM

KUALA LUMPUR, Jumaat — Sambutan ulangtahun ke-10 penubuhan Wilayah Persekutuan yang bermula esok akan melibatkan penduduk berbilang kaum dari berbagai peringkat — kanak-kanak hingga dewasa.

Satu aturcara sambutan diatur untuk menyemai dan memupuk perasaan muhibbah dan saling menghormati antara satu sama lain di kalangan penduduk Wilayah Persekutuan.

Tema perayaan tahun ini ialah "Sopan Santun — Budi Bahasa, Amalan Kita."

Menurut Pengarah Perhubungan Awam dan Kebudayaan Dewan Bandaraya, Encik Mohd. Shukran Abdul Halim, tema tersebut adalah sesuai dengan usaha memupuk semangat muhibbah dan saling menghormati antara penduduk berbilang kaum.

Beliau berkata penduduk Wilayah Per-

sekutuan juga digalakkan mencintai dan berbangga tempat tinggal mereka dengan mementingkan kecantikan dan kebersihan alam sekitar.

Mereka juga dianjurkan supaya berdisiplin, ramah-mesra antara satu sama lain dan bertoleransi terhadap tekanan keadaan seperti kesesakan jalanraya supaya suasana muhibbah dan damai wujud di Wilayah Persekutuan.

Antara acara-acara kemuncak perayaan tersebut ialah pameran Kuala Lumpur 10 tahun maju dan makmur di Muzium Negara, yang akan dirasmikan oleh Menteri Wilayah Persekutuan, Datuk Pengiran Othman Rauf pagi esok.

Pada pagi Ahad pula, pertandingan memancing ikan diadakan di Tasik Perdana dan Pesta Grand Prix kereta pandu jauh di Taman Titiwangsa.

Manakala pada sebelah petangnya pula, satu upacara

penyerahan 25 ekor kuda Bajau akan diadakan juga di Taman Titiwangsa.

Pada Hari Wilayah Persekutuan, 1 Februari, Perdana Menteri, Datuk Seri Dr. Mahathir Mohamad akan merasmikan pembukaan dan mengisytiharkan nama baru bagi Kampong Konggo.

Pada hari yang sama juga berbagai acara permainan dan sukan seperti kereta pandu jauh, papan layar, lumba kolek, payung terjun dan pancaragam sekolah-sekolah diadakan di Taman Titiwangsa sehari suntuk.

Persembahan kebudayaan juga diadakan di Panggung Anniversari dan Panggung Bandaraya selama dua malam.

Satu jamuan Datuk Bandar akan diadakan di Hotel Hilton pada malam hari Rabu di mana Seri Paduka Baginda Yang di-Pertuan Agong dan Seri Paduka Baginda Raja Permaisuri Agong akan berangkat hadir.